

Na osnovu člana 27. Zakona o vijeću zaposlenika („Službene novine Federacije BiH“, broj: 38/04), a u skladu sa odredbama člana 111. Zakona o radu („Službene novine Federacije BiH“, broj: 26/16) i članova 77. i 90. Kolektivnog ugovora za područje telekomunikacija u Federaciji Bosne i Hercegovine broj: 03-02-727-1/2018 od 9. 7. 2018. godine odnosno broj: 2.4-24850/80-18 od 9. 7. 2018. godine BH Telecom d.d. Sarajevo kojeg zastupa generalni direktor Mirsad Zaimović, dipl.ecc, (u daljem tekstu: Poslodavac) i Sindikat BH Telecoma kojeg zastupa predsjednik Fikret Alić, (u daljem tekstu: Sindikat) zaključili su dana 4. 9. 2018. godine sljedeći

SPORAZUM

Član 1.

Predmet ovog Sporazuma je uređivanje međusobnih odnosa između Poslodavca i Sindikata kao i prava i obaveze radnika iz rada i po osnovu rada koja nisu uređena Kolektivnim ugovorom za područje telekomunikacija u Federaciji Bosne i Hercegovine (u daljem tekstu: Ugovor).

Član 2.

Poslodavac se obavezuje da radniku sa kojim je zaključio ugovor o radu na neodređeno vrijeme, a kojem otkazuje ugovor o radu nakon 2 (dvije) i više godina neprekidnog rada, osim u slučaju ako se ugovor o radu otkazuje zbog kršenja obaveza iz radnog odnosa ili zbog neispunjavanja obaveza iz ugovora o radu od strane radnika, umjesto otpremnine iz člana 77. Ugovora, ukoliko je to za radnika povoljnije, isplati posebnu naknadu po osnovu ukupne dužine radnog staža kod Poslodavca, koja će se utvrditi tako što će se za svaku godinu radnog staža kod Poslodavca isplatiti novčani iznos od 2.300,00 (dvije hiljade tri stotine) KM, s tim da ukupan iznos naknade ne može biti manji od 10.000,00 KM niti veći od 50.000,00 KM.

Novčani iznos iz stava 1. ovog člana utvrđuje se posebnim sporazumom između radnika i Poslodavca koji će se ponuditi radniku uz odluku o otkazu ugovora o radu.

Novčani iznos utvrđen sporazumom iz stava 2. ovog člana će se isplatiti radniku odmah nakon što odluka o otkazu ugovora o radu postane konačna.

Radnik ima pravo na plaću i sve naknade iz radnog odnosa ostvarene do isteka otkaznog roka.

Visina iznosa posebne naknade iz stava 1. ovog člana predstavlja neto iznos koji će biti isplaćen „na ruke“ radniku.

Član 3.

Poslodavac se obavezuje obezbijediti plaću, odnosno naknadu plaće i druga prava, kao svim drugim radnicima kod Poslodavca u punom iznosu za predsjednika i sekretara Sindikata, za vrijeme trajanja njihovog mandata u Sindikatu, u visini osnovne plaće koju bi imali da su radili na svom radnom mjestu ili u skladu sa odlukama tijela Sindikata ukoliko je to za njih povoljnije. Osnovna plaća predsjednika i sekretara Sindikata utvrđena odlukama tijela Sindikata ne može biti veća od plaće koju su imali u momentu zaključenja Ugovora.

Poslodavac će posebnom odlukom, za vrijeme trajanja mandata u Sindikatu, utvrditi pripadajući iznos osnovne plaće za predsjednika i sekretara Sindikata.

Član 4.

Ovaj sporazum primjenjuje se neposredno na sporazumne strane i sve radnike zaposlene kod Poslodavca.

Član 5.

Ovaj sporazum stupa na snagu danom obostranog potpisivanja od strane ovlaštenih lica sporazumnih strana, a primjenjuje se do isteka Ugovora.

Sve izmjene ili dopune ovog sporazuma moraju biti sačinjene u formi ovog sporazuma, u suprotnom su bez učinka.

Ovaj sporazum ne može prestati na osnovu odustanka od sporazuma bilo koje sporazumne strane.

Poslodavac i Sindikat mogu raskinuti ovaj Sporazum prije ispunjenja uslova i isteka roka iz stava 1. ovog člana isključivo sporazumnim raskidom. U slučaju sporazumnog raskida o istom se sačinjava pismeni otpravak u istom broju primjeraka kao i ovaj sporazum.

Član 6.

Ovim sporazumom se sporazumno raskida i prestaje da važi Sporazum broj: 01-19-58999/18 od 13. 6. 2018. godine odnosno broj 2.4-24850/71-18 od 13. 6. 2018. godine zaključen između Poslodavca i Sindikata.

Član 7.

Ovaj sporazum je sačinjen u 6 istovjetnih primjeraka, od kojih svaka strana zadržava po 3 primjerka.

BH Telecom d.d. Sarajevo
Generalni direktor

Mirsad Zaimović, dipl.ecc.

Broj:

Sarajevo,

04-09-2018

Sindikat BH Telecoma
Predsjednik Sindikata

Fikret Alić

Broj:

Sarajevo,